

Suns 2011 en Svizra rumantscha

■ (cp) **La terza ediziun da SUNS vegn ad esser en Svizra, en Grischun! La fin d'emna dals 16 e 17 da settember vegn la Fermata a Falera ad esser in lieu cun ina babilonia da linguas.** 10 furmaziuns ed interprets/as che represchentan minoritads linguisticas da l'Italia, l'Austria, la Slovenia, la Germania, la Frantscha e la Svizra s'entaupan là per ina concurrenza da musica, il festival SUNS 2011. Ils dus victurs pon lura participar al festival LIET INTERNATIONAL, il pli grond eveniment da chant e musica da minoritads da tut l'Europa. In dals victurs vegn elegì dal public ed il segund dad ina giuria internaziunala.

2009 e 2010 è SUNS vegnì oragnisà ad Udine, en l'Italia. Il LIET INTERNATIONAL percenter è mintg onn en in in auter lieu. Il 2011, ils 19 da november, tar ils Furlans ad Udine. Uschia han els tschertgà insatgi ch'organisescha SUNS 2011. Per la Svizra Rumantscha èsi in'onur d'astgar surpender per in onn SUNS, uschia che quel eveniment ha lieu per l'emprima giada da nossas varts.

En il center dal festival SUNS stat mintgamai la singula chanzun. Quai duai esser ina chanzun nova, senza restricziun da stils: da rock e jazz fin chantaurs e rap. Las chanzuns inoltradas vegnan lura examinadas d'ina giuria da

preselecziun e 10 da quellas dastgan la finala participar ils 17 da settemper a SUNS 2011. Participar pon musicistas da tut las etads.

Formaziuns ed interprets rumantschs interessads pon inoltrar lur chanzun en fin l'emprim da zercladur.

La saira per bands rumantschas – 20 onns GiuRu

La saira avant SUNS 2011, ils 16 da settember 2011, datti anc in'occorrenza supplementara EXCLUSIVAMAIN per bands rumantschas. La band ubain il musicist, la musicista che gudogna quella saira sa qualifitgescha sco 11 avla participante per SUNS 2011, la concurrenza dals 17 da settember. La giuria sa cumpona d'experts da la scena da musica rumantscha. Quel eveniment è en il medem mument era la festa per il 20avel anniversari da la GiuRu, l'organisasiun da tetg da la giuventetgn rumantscha ch'è vegnida fundada 1991 a chaschu da la Scuntrada a Laax.

Quists eveniments vegnan organisads da la GiuRu, da la Lia Rumantscha e da Radiotelevisiun Svizra Rumantscha sco partenari da medias. Manadra da project è Lea Franke.

Per dapli infurmaziuns ed il talun d'annunzia:
www.sunscontest.com
www.liet.nl